

四諦論卷第二 第三同卷

逸八

婆 藪 跋 摩 造

陳 三 藏 眞 諦 譯

分別苦諦品第三之二

齒落相等不皆徧有苦非不徧云何說老是

苦聖諦者答徧滿逸八三界諸行變異說名為老

是苦聖諦如壽命滅如經言一切衆生以老

為法復次諸天身形微妙稍損變害前後異

故非無有老細故難知猶如其身復次住前

後異是有為相徧滿諸行說名為老如牛同

異有為不住念念滅故云何有老者答一切

有為法刹那刹那滅實無有住依相續住故

說老相如江燈雨是江水流念念不住見相

續不斷世人說言此江流急或言江長燈雨

亦爾復次生死中間說名為老何以故初五

陰起是名為生最後陰壞是名為死是二中

間諸陰變異病對治故死生校具故說病為

苦若由病故身恒苦者云何不違此偈無病

第一利等答冷熱等病來逼迫故說身恒病

免癩漏等重疾病故遊戲威儀讀誦思修有

力有能故依此身說於無病為第一利復次

行苦火所然故說身恒病暫離苦故說無病

為第一利復次恒治助故說常病身界暫調

故說無病為第一利若天道無病一切衆生

以病為法此言應救答陰生為苦徧滿三界

是天道病如經中說色生是苦生諸病依處

故如色餘陰亦爾又經說比丘若說病者是

五陰別名乃至癱刺等又餘師說天將退時

身心麤動是名天病正道論說病為業果是

業果苦非苦聖諦者答是業果報不離愛果

是故說業果報即說愛果會愛不離業故如燈與光業愛我見識果苦為性故苦諦所攝故不相違佛說苦名為病又偈說飢為第一病如此二說云何為異者答若說痛苦重中輕病皆悉被攝飢則不爾故二說有異復次不可治故說飢為第一病何以故飢苦難治治不窮故如間日瘡病若眼病等則不如此復次無止際故是飢病者從生至終永無暫息餘病不爾復次飢病恒須治故如朽弊屋相似無病如怨詐親徧一切處故搏食眾生並患飢苦如地獄品說是故飢病最為第一云何為死者答命根斷絕說名為死徧一切眾生故由有火大能消飲食身界毒蛇相乖違故其性盡滅由此滅故諸根無食隨火而滅心及心法根為上緣以根滅故心法隨滅

煖命及識捨離身根是時名死如偈說煖命及意識 若捨離於身 眠屍橫在地如枯木無知復次同聚所得陰界入等相續斷絕是名為死死有二種一自性死二橫死自性死者復有二種一由業盡二由命盡橫死亦有二種一者自橫二者他橫復次死有三種一隨剎那死二橫死三因盡死隨剎那死者從託胎已來乃至柯羅邏等十一位無瞬無息剎那謝如偈說從初夜眾生 愛託住於胎 無礙自然去一向往不迴 又如經說比丘汝等剎那剎那生老及死是名隨剎那死橫死者毒火刀仗等自作或他作因此命根斷是名橫死因盡死者感長壽

業盡滅無餘是死真實唯羅漢有猶如燈盡
是名因盡死云何死相云何死事云何死緣
答命根斷絕是名死相捨離本道是名死事
生為死緣云何死苦者答怖畏苦故是人臨
終為死金剛之所破壞應往他方非所究悉
將離親友我之愛熱所護身屋崩破壞時永
離所作生重怖畏故說死苦復次火燒熱故
若人曾經作惡不樂行善將命終時破戒因
故見未來生惡道相現起大憂悔身心焦惱
如死法經說故名死苦復次劇胎苦故是人
在胎中時恒受重苦或母飲食相違威儀疲
極他所逼苦雖受大苦而不失命若死苦來
頓奪前苦命根即絕出胎亦爾雖受大苦亦
不失命死苦若來奪此生苦命根即滅復次
在少壯位受用六塵不知厭足與所愛親共

住未久由少壯無病性力自在財物勝故恒
起醉慢是時若死其苦無比若人過少壯位
財寶巨富穀帛資生皆悉具足或被王重罰
或遭因病作是思惟我必應死其心已決眼
滿熱淚咽喉噤塞觀愛親屬目不暫瞬死至
將去何苦劇此是死至者如大山來行四方
便亦不能制如大力怨不可摧伏食噉一切
如馬口火燒曝一切如劫末日一切衆生所
不能度如海水動不能過岸如金剛霹靂碎
五陰山如大猛風拔倒身樹如迦樓羅吞噉
陰龍如飲味鬼卷八伺人過失如大怨賊恒奪命
寶如重罪人心無安樂如惡國王重罰難謝
如春等時必定當有以是義故說死名苦放
逸死破戒死生緣死此三何異者答慧命斷
故名放逸人死戒清淨命破壞失故名破戒

人死壽命根斷故名生緣死復次退墮正法
名放逸死失比丘性名破戒死退聚同分名
緣生死又有覺無覺死有悔無悔死有放逸
無放逸死有著無著死有調伏不調伏死少
分調伏死其相云何答行善凡夫聖及菩薩
正起憶念捨壽命根名有覺死異此名無覺
死破戒人死名有悔死持戒人死名無悔死
由五醉故不恭敬行法律學處名放逸死異
此名不放逸死於父母妻子等起愛著心而
捨壽命名有著死異此名無著死阿羅漢等
在六恒住調伏六根捨壽命根名調伏死行
惡凡夫散漫心死名不調伏死有學聖人捨
壽命根名少分調伏死五陰念念自滅他害
等死云何得成答諸陰實念念滅相續恒流
依相續故他害等死得成如約相續故說燈

滅復次諸根無事能故譬如破餅復次壽命
根壞故有人說言壽命根非剎那剎那滅何
以故若念念滅壽命亦無時死非時死他害
死等皆不得成三種病亦不得成是故命根
非念念滅云何為怨憎會者答怨憎親愛不
定故若塵是所憎怨是其聚會亦是所憎如
人於豬食外曰若爾苦諦不成立以不定故
答不為怨親塵不定故怨憎會所生苦不定
如境界不定生善則定惡亦如是怨憎會苦
亦復如是復次宿世惡業相似果聚集名怨
憎會立名為苦復次怨憎會苦者約苦受及
資糧說何以故一切衆生愛樂憎苦故是受
會名怨憎會復次惡友共聚多過失故名怨
憎會苦如偈所說
與惡友共聚 非聚多過失 是功德最大

離則無憂悔 善友共聚價 我思難判決
分離時是苦 是共聚等價
復次修淨戒人觀細失怖畏犯受惡戒事是
其怨憎生悔熱故惡覺觀起是修行人憎怨
能枯滅善法故煩惱燒然是聖人怨能逆心
靜故此中說惡業法煩惱果相應是名怨憎
會云何怨憎會相云何怨憎會事云何怨憎
會緣者答非所愛聚為相心憂為事業煩惱
為緣云何怨憎會苦者答逼惱為體故如惡
隣里為苦因故如獸見狼逼身心故如毒刺
在體瞋恚緣故如見本怨無安因故如無憂
王傳復次與種種重苦品類相應能害自身
故如阿難宿傳非愛相應多生求欲求欲因
緣生種種苦如偈言受苦人求復次由惡友
故生大驚怖如鹿見獵師如人坐卧天衣所

覆寶牀燒赤鐵鍼以刺其身身心戰動生大
困苦是故名為怨憎會苦若怨憎類有聚會
者永不相離此義應至者答一時境界性用
相續共生當知諸法恒相聚會怨憎聚會異
此義故難不得成復次苦受是名怨憎此受
不離於心如義者順難答如經中說如攝
有多種會義亦然如持散偈言
一分具分心 道用類相應 勝處及自性
經說名法攝
如攝有多種會亦如是謂一境不相離相對
相著等是故此難違順皆得云何為親愛離
者答是親愛塵或名眾生或非眾生與其別
離名親愛離復次少壯無病壽命家色形富
貴自在親友相離亦名愛別離復次善業果
報六入觸攝是退失名愛別離如退天道復

次樂受破壞名愛別離何以故此樂受是愛著處由此愛著於色等境亦生愛著是樂受伴謂想行識等亦所愛著若論實義唯樂受壞名愛別離云何親愛離相云何親愛離事云何親愛離緣者答離愛類為相心憂悲為事卷八遭敗為緣云何親愛離苦者答因愛別離是諸衆生憂悲內然猶如空樹野火燒復如經說若天退墮愛別離苦劇於地獄如目連宿傳復次若衆生疑聞見憶念親愛別離憂悲苦生是故名愛別離苦復次父母妻子所愛眷屬別離因故如併失財懊悔失心如著鬼狂謾語啼哭悶絕顛掉如臨死人如失王位重苦所逼如無識無知癡亂默然如船舶破沒憂悲海故名愛別離苦老等聚會即怨憎會少壯等離即親愛離更說怨憎會愛離云

何非重說者答老等聚會少壯等離如此二苦羅漢亦有唯無憎會如偈若一切永無 怨憎及親愛 無憂無染心是人得涅槃以此義故不名重說復次由老病等無分別苦與羅漢共如前偈說惡老汝可患等怨憎會苦及愛別離因分別起皆屬心苦未離欲人則有此苦復由老病等名依內苦怨憎會愛離名依外苦故非重說何所求不得者答遠離苦與苦不會則得歡樂與不相離求此不得名求不得苦復次與生老病死等諸苦求不相會而不能得是生定法故故名求不得苦復次求與怨憎不會親愛不離既不能得故名求不得苦外四此苦在前二苦已顯現何用重說答非所愛共聚名怨憎會是所愛

分離名愛別離今求怨不會求親不離翻前
二種立此為苦故非重說復次已得未捨與
所憎塵共聚名怨憎會已得未捨與所愛塵
不得共聚名愛別離未得未捨是所愛塵求
不能得名求不得苦由三世安立故非重說
云何求不得相逸八云何求不得事云何求不得
緣者答求不得者違逆意欲為相以憂渴為
事現無功用宿不作善為緣云何求不得苦
者猶如如意餅等破故失求王位等願復次
苦因緣故是所求欲五塵由不能得欲火所
然如述波伽等燒然成灰故名求不得苦復
次三時中能生苦故是所求利我應不得今
不得已不得由此生憂悲等苦故名求不得
苦命塵即苦至得亦苦求之不得云何為苦
者答以不定故得者未必皆苦何以故苦得

信根不名為苦復次是厭憂依止故求不得
者能生求者厭惡憂惱心得五塵利則不如
是是樂想故復次如少壯身老為後故說名
為苦如是得五塵利敗為後說名為苦如取
陰為苦依止說名為苦得五塵利說名為苦
義亦如是以何因緣求之不得者答因緣不
具故譬如種子若無有緣芽不得生由宿世
慳吝嫉妬邪見瞋故壞大家因今求不得如
鬱多羅比丘等宿傳因惡法故離苦受樂求
不能得譬如阿鼻逸八地獄衆生求不得者略說
三因一無宿世善二自無功用三他不愛敬
云何略說五陰為苦答為攝初中後苦故生
為初苦死為後苦老等憂悲等名為中苦復
次為攝有間苦故有間苦者如老病死等無
間苦者恒隨一切有分復次為攝各各自相

無邊衆苦故說五取陰名通相苦何以故
諸苦別類無邊故假使如來於無量劫廣說
苦相亦不能盡復次生等諸苦如火五取陰
如薪如燒然經說復次五取陰爲生等諸苦
田地何以故取陰生苦名生取陰變異苦名
老取陰逼惱苦名病取陰破壞苦名死取陰
非愛聚苦名怨憎會取陰親離散苦名愛別
離取陰所須不遂名求不得略義云何答有
三種一多二異三一處謂三世分散種類不
同攝在一處故名爲略復次略有二種一義
略以一義攝多義譬如真實二名句偈略能
攝略義如眞寶器如是苦有多義多名但以
一義一名攝之皆盡說名爲略問諸陰何相
陰義云何諸陰同一行相云何不立一陰陰
及取陰二種云何答如是等問五陰論思擇

品中已廣分別問云何說取陰名苦不直名
陰苦答欲分別諦有四相故說取陰爲苦若
直說陰是苦則二諦不成何以故明陰戒定
等五陰皆成苦諦故問取陰何義答愛欲是
取義此陰能生取爲取所生與取相應取所
隨逐能有取故故名取陰問隨觀一苦則通
達苦諦何用廣分別諸苦相耶答行人須廣
觀衆苦生厭離心生厭離心已能觀通苦得
入正觀爲此用故應須廣說復次爲分別生
老等苦生思擇智得此智已觀苦一義決無
分別智因此得生此智以平等爲境不勞功
用自然而流無有覺觀名第八智依法境生
如寶象譬問如經中說名爲樂是樂依止云
何而說取陰爲苦答如偈言
執對治樂故 顛倒欲故樂 經說爲苦故

正見故無樂

此義如五陰論廣說於輕品苦中及苦對治中起於樂想實唯是苦問此經中云何略說餘經廣辨色為苦答為多聞慧人是故略說取陰為苦若無聞慧則為廣說色取等為苦如是為見光未見光人故廣略說問云何說取陰為苦答苦盛逼故如人處七寶樓種種嚴飾可愛五塵能悅其心生大歡樂小針所刺即生苦受忘失前樂如鹹酸味復次苦最多故謂老病死愛別離怨憎會求不得憂悲苦惱覓守失苦逼害苦等取陰中最多樂少虛妄如壞井水問略說八苦其義云何答眾苦依止故生名苦能令變壞故老名苦能逼困身故病名苦能滅諸根故死名苦非愛共聚故怨憎會名苦可愛相違故愛別名苦希

望不遂故求不得名苦是眾苦相故取陰名

苦譬如射棚復次有者是真實苦有即是生

生是何法謂名及色色為老病死所害名為別離怨憎會求不得苦所害取陰為眾苦所害復次老病死名為身苦以無分別故愛別離等三名為心苦由分別起故生及取陰是身心二苦復次由生說行苦由死說壞苦所餘五句說名苦苦此三苦以取陰為由復次取陰有起名生六道出現故身變熟名老以萎悴故身界不平等及憎長名病令相違故命終陰壞名死離本道故非愛受因共聚怨憎會乖意相應故愛受因相遠名愛別離與愛不共故所欲不遂名求不得如願不成故為一切苦種本由故取陰名苦諸苦自生無功用故婆藪跋摩法師分別苦諦品究竟

思量集諦品第四

說苦諦已云何次第說於集諦集者何義云
 何自問及答是渴愛何者渴愛何相何事何
 緣是渴愛是言勝義云何渴愛即集此言自
 足說渴愛已何用復說能感後有能感後有
 其義云何能感後有決定喜欲相隨處處愛
 著云何作多種說喜欲何義隨義云何處處
 愛著重言云何有諸別惑能作集相云何但
 說渴愛為集何因獨說渴愛為集不說諸業
 若貪愛等亦是業煩惱集云何但說苦集耶
十二之一
 無明緣觀味緣三受緣等愛其異云何已說
 四大觸名色各為諸陰因復說渴愛為因此
 二說云何不相違渴愛無明我慢業食皆為
 苦因此等異相云何喜欲欲等其義云何藤
 林等是貪別名其義云何

汝問說苦諦已云何次第說集者答已決心
 信果未識信因令識信因故次說集為顯苦
 諦隨屬因緣復次為受化者迷十二緣生故
 說苦諦依因緣生復次苦諦猶如機關隨屬
 因緣故自性羸弱及無我相復次世間貪愛
十二之二
 堅鎖之所繫縛不能出離生死牢獄故顯所
 縛能縛復次有諸眾生作如是計此苦諦者
 無有始終難可除滅由此執故不修正勤是
 故佛說苦雖無始由因緣生故可除滅譬如
 種子故應修正勤汝問集何義者答平等聚
 生是名為集離此三義則不成因復次令起
 有本泉源能成能現遮因緣是名集義汝問
 云何自問及答者答有諸弟子不懈怖畏定
 心護此三事故佛自問答者為破難邪因顯
 立正因有諸異執謂梵王自在及天人時性

四大空隣虛等以為正因為破邪執欲顯正
因故佛自問答復次於十二緣生等諸經已
說多種集有諸弟子未知此經定以何法為
苦集故佛自問答為欲令得決定智力復次
為覆智受化不通達略教中義為令開覺故
佛自答復次為勝智受化覺觀多故不執持
令智堅固故佛自問答復次為了智受化令
得決定智力故佛自問答復次為分別智弟
子令得了別猶如然燈故佛自問答汝問是
渴愛何者渴愛何相何事何緣者答是諸眾
生恒觀有為法功德依有用資糧心無厭足
故名渴愛如飲鹹水如人盛夏晝日光照熱
渴所逼周徧覓水來飲鹹海鹹海有竭此渴
無盡如是世間凡夫常為生死資糧愛欲焦
然其心邪妄分別令生熱渴一向專求五欲

快樂眼耳身識及心憶持所受用物已得未
得永無厭足故說此法名為渴愛復次不知
厭足名為渴愛如火草薪華果酥蠟等是所
燒然於取類中無有厭足世間凡夫貪愛然
心於人天中上妙五塵念念受用不知厭足
如頂生王復次渴愛類見性別異故各為二
種類異者於取陰中起我執我愛是名緣內
類貪於非取類中起我所執是資糧愛名緣
外類貪見異者依因有見願有勝生是名有
愛依無有見願樂我斷名無有愛性異者貪
愛倒起覆藏為事猶如雲網故名上心貪愛
為隨眠隨逐為事猶如鼠毒名離心愛復次
渴愛因依緣業別異故各為三種因異者願
樂未曾得塵是愛名求覓苦因於已得塵心
生貪著是愛名守護苦因於已失塵心生懊

惱此愛名憂悲內熱苦因依異者謂眾生處
 所受具眾生者樂得未來陰求欲生故名依
 眾生愛處所者樂三有道常求此處名依處
 所愛樂好聲觸色味香等塵境界求欲受用
 名依受具愛緣異者謂貪愛能作煩惱業苦
 緣及緣此三起業異者謂平等不平等相續
逸八
 渴愛平等愛者依道理求覓受用名平等愛
 翻此名不平等愛相續愛者隨眠貪愛無始
 相逐名相續愛復次渴愛取道對治資糧別
 異故各為四種取異者於欲界中欲喜迷悶
 渴愛貪著名為欲取於我言見戒等中渴愛
 著亦爾道對治異者謂四聖性所對治故資
 糧異者謂飲食衣服卧具醫藥復次渴愛依
 三受別異故為五種於樂受中生二種愛謂
 聚集愛及不相離愛於苦受中亦生二種謂

不聚會愛及相離愛於捨受中起無明愛復
 次渴愛以事異故離為五種謂未得求得以
 願為事二生願樂已求覓為事三求覓得已
 增長為事四增長已守護為事五既守護已
 後時失壞憂悲為事復次渴愛依五陰故五
 依六根故六依六根各有三受故成十八復
 次依結及離結故三十六如是等是貪愛樹
 隨眠為根我愛資糧受為身軀三界貪愛為
 其高大六愛聚為枝愛行為茂葉八百愛為
 華生等為惡果如此渴愛為苦集因為苦生
逸八
 因名為渴愛此中應知渴愛相者心喜為相
 事者無厭足等十一種為事緣者觀有為功
 德為緣汝問是渴愛是言勝義云何渴愛即
 集此言自足者答渴愛多種若能感後生乃
 是定集餘則不取若不爾者聞正法等亦應

爲集復次是渴愛能感未來有若不能感則非所取復次是渴愛若與喜欲相隨則名爲集若不爾者則非所取復次爲欲簡除似集諦法故言是渴愛復次是守爲顯證量如現世苦因渴愛生證量所得當知去苦生不離渴愛如郁伽長者經說汝問說渴愛已何用復說能感後有者答渴愛者此言未了故說能感後有顯定渴愛若但說渴愛是集則阿羅漢渴愛水等亦應是集若有渴愛能爲滅渴愛依止亦應成集汝問能感後有其義云何者答能令識等陰著後有故何以故我及我所是所執處如是渴愛能令識等執著此處如塵著濕衣種子著濕田復次能生未來有故如母生子復次能爲未來生食故如識食觸食復次能引能愛故故說能感後有又

有往昔耆舊諸師釋佛說渴愛有四因緣能感後有一能使相緣如經言睡眠貪愛未被拔除是苦恒生恒續猶如龍池二能攝諸道故如經言比丘若於色等境界起貪欲愛著是識隨依色住受想行亦如是三能結能續如經言能結能縫不捨境故令未來世三有得生四能令受生如經於此四食處若有愛欲名色即生汝問能感後有決定喜欲相隨處處愛著云何作多種說者答此三句皆是渴愛別名譬如人手名爲頰卷八悉多亦名柯羅十六亦名波泥復次果伴境界別異是故多說能施未來果故說施未來果故說能感後有喜欲爲伴故說喜欲相隨取種種境故說處處愛著復次有法但感後有不與喜欲相隨如睡眠貪愛有法但與喜欲相隨不能生有如

不隨界貪故應具說多名汝問喜欲何義者
答喜者於有資糧中心生安樂說名為喜樂
此中生欲名為喜欲譬如色欲復次喜種類
欲名為喜欲譬如寶餅復次是樂有染名喜
心著名欲合此二種故名喜欲譬如名色復
次喜欲更互相生故名喜欲如菴羅子等汝
問相隨義云何者答共義名隨此隨眠與上
心為伴能生後有復次外愛共行故說內愛
與喜相隨譬如愛取復次隨者得地為義復
次分別部說相隨有四種一境界相隨二相
應相隨三間雜相隨四緣起相隨境界相隨
者如經說若人起覺觀分別與色相隨相應
相隨者如經言此心與慈相隨間雜相隨者
如經言是人修習信根與慈相隨復次有經
說染著憎恚相隨思惟相隨緣起相隨者如

經言修習正見與無放逸相隨此論所明喜
欲即是間雜相隨汝問處處愛著重言云何
者答於三有中愛著種種諸界於諸界中愛
著種種生處於諸生處愛著種種衆生聚於
衆生聚中愛著種種諸根於諸根中愛著種
種諸塵於諸塵中愛著種種諸業復次心猴
行境不定恒樂取塵隨逐渴愛種種諸有及
有資糧由隨攝捨處處愛著復次觀著求處
行不定故如偷稻牛復次棄取餘塵亦不離
欲譬如五囚人母故說處處愛著汝問有諸
別惑能作集相云何但說渴愛為集者答為
最勝故若渴愛王所至之處一切惑衆皆同
聚集復次由渴愛攝故若渴愛不令餘惑噉
味餘惑則滅若諸惑不起貪愛亦不起何以
故無分別依故復次設無餘惑但有貪愛生

死亦起如手搏濕沙復次難分別故由此渴
愛亦入善法但觀口欲如內怨家復次至門
不入故如阿那含至涅槃門由貪愛故不能
得入成上流人問無明亦勝何故不立答不
然無明盲人由渴愛故墮陰坑苦譬如盲象
求欲後生故受來報不由無明譬如生盲入
諸門以是義故故說渴愛為集汝問何因獨
說渴愛為集不說諸業者答煩惱勝故何以
故貪愛等是實生因業不如此云何知耶業
雖具在為貪愛盡故諸阿羅漢無復後生前
來已說有真似集貪愛等能為有因故是實
集諦業為引有因故說為相似集復次貪等
由道所滅業則不爾何以故諸佛等究竟修
道已猶聞有殘業在復次業不墮界故不名
真集汝問若貪愛等亦是業煩惱集云何說

但為苦集者答有如是義此中為立四諦故
諦為苦集何以故於聖諦中簡擇真實因故
說渴愛等為苦諦集復次有及生陰渴愛為
集是渴愛於現世中與生等諸緣共作煩惱
業集不如渴愛獨為苦集故但說渴愛為苦
諦集復次定以隨眠渴愛為苦諦集為顯此
義佛說偈言
如樹根未拔 雖斷猶更生 隨眠愛未除
苦體恒相續
約緣內渴愛說緣愛起取約緣外渴愛說緣
取起求覓業汝問無明緣觀味緣三受緣業
愛其異云何者答經說無明為愛緣此愛為
煩惱緣起緣說觀味見境起常邪等見因此
起愛是愛為業緣起經說由貪愛故得三種
受是愛為受緣起復次一切煩惱無明為緣

此貪愛緣無明起故說緣無明愛一切諸見為諸業緣緣此諸見起貪愛此愛名業緣愛一切諸苦三愛為體緣此起愛名苦緣愛復次不信了為因名緣無明愛觀有為法樂常等味邪智為因名緣觀味愛餘類為因名緣受愛此愛為緣起及果有三由境界有六汝問已說四大觸名色各為諸陰因復說渴愛為因此二說云何不相違者答為顯有因故說渴愛有已為顯等分因故說四大為顯種種因故說於觸為觸不一故受有三為堅信因故說名色如大緣生緣說阿難若識不託母胎是迦羅邏得結實不不得世尊阿難若無迦羅邏是識能託胎不能世尊由此二法更互相持故得堅住復次無始時因名得愛一期因謂四大剎那因謂觸及名色具二

因謂宿世因及現功用因復次五陰宿世因謂渴愛於受生中四大為初因如迦羅邏為頽浮陀等因俱起因名觸先時及俱起因名為色汝問渴愛無明我慢業食皆為苦因此等異相云何答渴愛為無別異因業為別異因食為引持苦因無明及我慢為一切因復次渴愛能為有因業為道因食為平等因無明及我慢為更互因復次渴愛為苦真正因是苦根本故所餘因為資糧集助貪愛故汝問喜欲欲等其義云何答塵已到故心生歡喜由喜生愛故名喜欲求未得塵名欲因此生愛名為欲欲汝問藤林等是貪別名其義云何答欲塵為境界能染於心故說欲染貪著四定及果是名色欲貪著三摩跋提及果是名有欲能障涅槃行說名為刺能燒熱心

說名欲火能垢汙心說名欲塵能令心濁說
名欲垢能纏繞心說名欲辦無思計故說名
欲縛令癡迷故說名欲悶心沉名欲著隨有
行故說名隨流常希望故說名無厭得無飽
足故說名爲貪障出離故說名爲蓋能覆藏
故說名煩惱令不離有故說爲結不正思惟
所觸惱故說名爲錐能縈束刺故說名爲藤
向上轉增故說名大欲周普界道叢根塵勝
樂等故說名爲徧著種種塵起種種著說名
愛著於生死資糧未得及得心生歡喜說名
喜欲無厭積聚欲塵利養名爲渴愛如是方
便輪迴送引不離生死說名欲將遊煩惱水
結愛行繩說名欲網從上下流入生死海說
名愛河譬如變異渴病所逼入塵海由此無
有飽足故名渴如海吞流如火燒薪等此惑

無滿說名無休能結死生前後無間故名爲
縫此渴愛在能今生死相續不斷或由自由
他能受六道生死故於餘惑中說名爲集具
如大有品中廣說此名解貪愛有十一種應
知一名二義三體四用五因六對治七淨八
不淨九生次第十立難十一救義若行人識
此起觀自行教他不迷道理故說此義思量
集諦品究竟

四諦論卷第二